

parte arancione: UFÌTZIU LÌNGUA SARDA DE SU SÀRRABUS

S'IDENTIDADI SARDA IN CUSTAS ELETZIONIS

Est acostendisiddi s'apuntamentu de eletzionis sardas, cumentzant a girai santixeddus, manifestus e boladoreddus.. vota a innoi, vota a cuddei. Nc'est a chini totu custu caddaxu de marraconis eletorali non praxit e nc'est a chini invècias praxit e donat tema de arrexonada in is atòbius a su tzilleri o cun is amigus. Calisiat su parri de donniunu is votatzionis faint parti de is momentus prus de importu de sa sociedadadi sarda. E dònna borta, manca a su in prus de sa genti parrant totus ogualis, is eletzionis e pruschetotu is campànnias eletoralis in su cumplessu tenint caratiristicas diferentis. Po nai, s'àtera borta, in su 2019, su "leitmotiv", o narendideddu a sa sarda "sa punna comunicativa" de sa campànnia eletorali furiat sa sanidadi. Ocannu invècias est una triva a chini amostat de essi prus sardu e a chini imperat de prus sa lingua sarda. Est unu sentimentu chi si iat a depi donai speru mannu po su benidori de sa stòria, de sa cultura e de sa lingua nosta. Ma foras de imbucai (o mellus arrui!) in custa triva, cosa chi non cumpetit a custu ofitziu, nc'est una domanda chi si depeus ponni, e nci depeus arrexonai beni. Poneus ca, chinisiollat chi binciat, su 26 de friaxu, cumenti a primu puntu de sa faina de governu pongat s'imparu de su sardu obligatòriu me in is scolas sardas (in sestu de bilinguismu, impari a s'italianu), eis a essi totus de acòrdiu? Su in prus fortzis ch'ei, ma seguramenti nc'est ancora una parti (non pitica) de sardus chi ancora tenint duda asuba de sa chistioni, chi pentzant ca imparai su sardu a is pipius siat de strubbu po su sviluppu connitivu, sociali e econòmicu insoru. Dudas chi funt arrastu de unu sistema sociali e istituzionali monolingui chi s'at incravau in su ciorbeddu ca su sardu tocat sbentulau. Nosu cumenti a ofitziu si poneus de còidu po ndi scotzai custas tontesas e donai un'àtera bisura de sa lingua nosta a is sardus etotu e a su mundu. Una lingua chi bivit e chi istat a su passu de is mudaduras internatzionalis, una lingua chi est siat arricchesa identitària e culturali chi aina de sviluppu connitivu de is generatzionis noas. Bastit a biri ita ndi seus faendi de su sardu imoi, in custu momentu ca fustei est ligendi.. est ligendi unu articulu de giornali chi fueddat de temas de livellu artu, de politica e de sociolinguistica.. in sardu. Depit essi sa normalidadi custa, sena de troci nudda a is àteras linguas, italianu in primis. Nci depit essi una dinnidadi paris po totus is linguas. E custu non ddu depeus pentzai e fai sceti nosu ca nci trabballaus cun sa lingua o dda fueddaus in su fitianu, ma totus, finas in is logus innui ancora si fueddat sceti in italianu. Cumenti in crèsia, in cumunu, acanta de su dotori, e finas in politica. Su sardu in su parlamentu nostu de Casteddu, a dolu mannu, est sèmpiri stètiu abbetiau e torrau a ogetu de certu intra partidus prus chi a elementu de unioni, de cumpartziri cumenti a sardus. Iat a essi bellu, una dii, chi in s'Assemblea Sarda si chistionessit, sena de bregùngia peruna, dònna lingua de Sardìnnia e chi, in is campànnias eletoralis, su de essi sardus fessat una cosa segura, de fundamentu, sena de tenni a bisòngiu de dda afirmari o de dda bantai po una pariga de votus in prus. Calisiat bentu at a tirai, s'ofitziu nostu at a essi sèmpiri a sa parti de su sardu e de is sardus. Po su mesi de martzu seus cuncordendi is cursus de lingua sarda, po ndi sciri de prus cumentzai a si sighiri me in is sòcial Facebook e Instagram o a si cuntatai a sa mail uls.sarrabus@gmail.com po dònna informatzioni, opuru podeis benni a s'agatai in is seus de s'ofitziu.